

狸貓換太子之落帽風（包公落帽）（唐健垣唱）

…
…

【南音短序】

【南音】阿壽獲此白銀，回家向親娘奏稟，親娘話包公佢過境，咁就多謝靈神。你去請佢嚟到寒窰，話我有宮闈冤案待稟，你就話劉妃與郭槐勾結，害宸妃又欺君。將太子，換作貓屍，佢咁良心泯，又要將個宸妃嚟到燒死，在那冷宮碧雲。嗰個包拯，佢向來，係關心民隱，何況來人居然講得出，咁多宮闈嘅秘辛。當下佢趕到寒窰，要把案情嚟到問，吓！誰知嗰個婦人，在窰中發話，話只准入去包拯一人。【腔】

【南音短序】（白：其他人在外邊等住。）

包拯忍氣吞聲，摸入去窰裡行近，（白：咁黑嘅。）因為窰中昏暗，又未點燈。佢隱約見一個婦人，端坐殊端品，張龍喝叫（白：跪低！）叫婦人跪稟，（白：我唔跪！）婦人話我只跪先王一個人。並問來者，是否包拯本人，喂，你休得瞞隱，包拯話堂堂官吏，（白：你個仔都見，）點會唔真。婦人話案情重大，必須謹慎，喂，你快跪低，等我摸吓，額頭是否有陰陽紋。（白：混脹！）後面張龍喝罵，喂！婦人無禮甚，睇你污糟邋遢，點可摸埋身。你快啲洗手又洗身，哼，然後慢慢稟，呢處又黑又臭，實在好難聞。婦人話，叫我洗手洗身，你哋唔使諗，除非用賜比阿包大人嗰個紫金盆，共嗰條龍鬚巾。

【中板】嗰陣包拯聞言，渾身打震，點解先王賜比我嘅寶物，佢都會知聞。我額頭有個陰陽印，你壽仔都明睇得見，先王賜嘅寶物，又點會隨身。

【慢板】我休要懷疑，請你從頭，有冤從頭稟，下官恭聽你每一句話，我極留神。

【腔】

（白：婦人話，包拯，我都知道先王御賜比你嘅寶物，係唔會隨身帶嘅。不過我要讓你知道，我知道你所有底細，咁你就好小心，聽我講嘢。）

【乙反南音短序】

【乙反】唉，回想前塵，唉！我傷痛甚，十八載昭陽苑內，我誕下小龍身。被那劉妃與共郭槐，把那陰謀混，用那死貓換去太子，陷害好人。又叫先王把冷宮，把哀家囚禁，更叫人放火，要害我一身。幸有忠義嘅宮娥，佢哋將路引，從後園逃出，未變作灰塵。嗰陣包拯聞言，驚魂震，點會你係宸妃娘娘，不幸身。聽講娘娘，當日火燒身，經已命殞，屍身經已驗過，有太醫奏聞。

婦人話燒死嗰個係宮娥，代哀家命殞，若無娘娘屍首，劉妃點會放心。

唉，可憐我外家遠處吉林無人問，我就流落在此地，做了盲人。

【中板】嗱我確係宸妃，曾受先王寵幸，記得在馬年七月入宮，侍候聖君。
我亦知你年方廿八，官升九品，七月初七個一日，你被封做了龍圖閣嘅大臣。

（白：係唔係？係嚟！）先帝膝下無兒，咁我八月就收你做螟蛉子，
賜你紫金盆尚方劍與及龍鬚巾。

包拯此時再無疑問，叩頭三拜，口稱兒臣。【短腔】

...

...